

摘藻堂四庫全書薈要

集部

欽定四庫全書薈要

集部

御選明詩卷五十九

詳校官原任主事 李斯咏



欽定四庫全書薈要卷一萬八千五百五十九

集部

御選明詩卷五十九

五言律詩十

李攀龍

同皇甫膳部寒夜城南詠月

片月掛遙岑層城曳素陰寒分空樹淨影落御溝深結
冷悲羌笛勻霜上搗砧西園芳宴後白雪復誰吟

白雪樓

諸郎難得意非是敢沈寘拙官無同病清時有獨醒千
家寒雨白雙闕曉煙青又值高樓雁寥寥不可聽

聞砧

永夜盧家婦深閨坐自傷拭砧散明月投杵上清霜別
恨繁鴛綺哀音送雁行同袍征戰盡刀尺斷人腸

出郭

出郭隨吾適人家杜曲邊溪深縈去馬山路入鳴蟬禾
黍殷秋作茅茨足晝眠可能祛物役歸買汶陽田

秋日村居

隱几憐清曉開軒命濁醪西風行薜荔白露綴蒲桃氣
逼蟬聲苦天含雁影高壯心堪自見秋色正滔滔

高齋清自掩遙夕病相看片月花間淨明河樹杪乾流
螢含火著宿鷺抱霜寒何限同袍意江湖坐渺漫

冬日村居

高卧堪人事幽棲豈世情老松寒更拙片竹冷逾清擁
褐江湖色鳴琴雨雪聲懶心常近傲不是學莊生

遙夜冷幽獨南山傍戶庭泉流霜下白野色海邊青風
亂將殘燒寒疎欲曉星偶因樵唱起延眺及林垆

送潘潤父

搖落荒山道君行日獨深解裝迎暮雨秣馬發秋林
僕知鄉淚風塵見客心十年悲未遇歸卧惜湖陰

寄許殿卿

漠漠雨如沙翩翩燕子斜官貧輕逆旅鄉遠重攜家
昨夜懷人去春風撫歲華獨行臨御水問使到梅花

十五夜謝山人同李明府見過得宵字

客有山中約人來江上遙張燈傳綵筆換酒出金貂貧
病看交好文章慰寂寥天涯還此會留醉駐春宵

重別李戶曹

舊遊京陌滿何處珥貂行念子從王事令人識宦情春
風吹遠別芳草送孤征莫歎謀身拙前賢重請纓

秋夜

豈敢歌芳樹多時信轉蓬鄉心生夜雨客病卧秋風大

藥三山外浮名四海中自知成汗漫還與衆人同

郊遊

何為驅車馬終歲慘塵顏偶出城西寺因看湖上山水
流芳草外人醉落花間復值巖耕客春風荷蓀還

王世貞

贈王山人

五嶽遊欲遍歸來鬢尚玄藏名詩句後避世酒杯前久
客鄉音改無家旅興偏脩然喚雙屐揮手向江煙

乍雨

細雨留高樹輕寒過小池
劇憐初夏節却似晚秋時
披荇魚知樂憑軒鳥暗窺
蕭疎故園思徐步欲何之

四月一日同于鱗子與諸君水頭放舟

歌管能回首輕舠自任風
人家漁網外山色酒盃中
心事歡仍見年光醉未窮
褰裳吾欲涉菰際忽驚鴻

過冶泉

偶經盤石坐下有暗泉
過受月苔陰少分雲竹色多幽

巖苔樵斧小屋見漁蓑不減滄浪興風塵可奈何

不寐

襖被據匡牀薰爐裊裊香緒風低宿樹孤月淨無霜戍
鼓交偏緩寒雞報轉長不眠須起舞塵匣暗干將

懷柔道中

馬足吾何限山行稍自寬人家梅雨色衣袖麥秋寒過
瀑添新徑歸雲改故巒斷腸沙雁起一一向長安

太原道中書事二首

盤陀十二驛驛驛似西川畢竟中無地還疑小有天
居民同伏鼠宿客傍棲鳶不待蟬聲苦秋霜向鬢邊
不斷峰巒色何由見晉陽傍山兔三穴入地鼠千倉
項為泉奔癭牙因棗熟黃吳兒莫相笑風俗古陶唐
藏經閣西偏俯小罨畫溪

紺宇藏經閣春雲罨畫溪隔花催小艇落日在招提
彼岸如相引真源自不迷老夫繙閱罷隨意步東西

王世懋

春日袁魯望見過分韻

河朔名仍在乾坤意未降
酒人唯我共國士許誰雙
秉燭深良夜聽雞過小窓
挂帆明日去春色動三江

過天界寺訪半峰師會師偶病強起留宿

匹馬到精舍悠然深薜蘿
人聲入寺盡山色閉門多
欲問簡編絕無言鐘磬過
心閒病亦好不為示維摩

毛公壇

沖舉何年事空壇尚此名
泉疑丹井出草共講臺平
地

盡山形轉林深水氣明
班荆坐相視寂寂愧浮生

送陸元量出按廣右

繡斧下雕題花驄拂柳嘶
霜清八桂外雲碧五羊西
問俗安烽燧飛章散鼓輦
君家一片石歸路好重攜

廬山雪

朝日照積雪廬山如白雲
始知靈境杳不與衆山羣
樹色空中斷泉聲天半聞
千厓冰玉裏何處覓匡君

謝榛

冬夜過雲翁留酌因赴西池君不果

眼前期不定萬事遠期難酒熟山人過詩成蠟炬殘
柝聲連巷動月色滿城寒歲晚梅花發誰同雪裏看

客居即事

客居何懶慢過午尚科頭老得醫書喜閒增詩債
愁春寒風偃樹天晚雪明樓莫謂常漂泊西來亦壯遊

春夜即事

春草非吾土春宵還自悲庭虛風稍靜簾捲月何遲
久

病兒知藥長吟妻解詩他年學耕稼肯負鹿門期

春園

水村人寂寂遲日敞柴關
菜甲春初細園丁雨後閒
沙邊來白鳥柳外出青山
此地多幽意行歌薄暮還

送杜太僕謫荊州

謫宦三千里誰憐賈傅才
漢江秋月上楚岫夜猿哀
心事登樓賦年光落帽臺
知君最愁絕湘雁逐春來
夏夜獨坐披襟當風頗有秋意賦此寄懷

散髮南樓夜，脩然披素襟。
蛩聲依草際，螢火落牆陰。
老破當年夢，秋生久客心。
遙思苔石上，坐聽美人琴。

送樊侍御之金陵

地入維揚路，天分牛斗墟。
秋帆二水外，春草六朝餘。
永雪生官舍，風塵走諫書。
從來經國者，寧不念樵漁。

曉起

曉起正科頭，時聞花外鳩。
出門疎雨歇，倚杖斷雲流。
綠草偏依水，青山半入樓。
況逢春酒熟，不負嗣宗遊。

除夕徐子與宅得年字

客裏歲時遷還來醉此筵
吳歌連子夜潘鬢感丁年
列炬明深院繁星動遠天
宮梅殊有意更向早春妍

寒食旅懷

薊北驚寒食淹留幾自嗟
春風來燕子落日在桃花
丘隴行邊淚江湖夢裏家
不知疎懶客何物是生涯

伏枕

伏枕無窮事虛堂秋夜深
松低半窓月山靜數家砧
老

鶴同幽意寒蛩伴苦吟百年兒女計誰識尚平心

次張祜金山寺之韻

孤絕寒逾迴蒼茫夜不分僧歸依島月龍定縮江雲天
漢窗前合風濤枕上聞好沽瓜步酒詩思在微醺

秋雨宿權店驛有感

驛燈分暝色野館滯秋陰已倦衰年事偏馳故國心夜
涼槐雨滴月暗草蟲吟歸夢不知路千山雲更深

大梁冬夜

坐嘯南樓夜孤燈客思長人吹五更笛月照萬家霜歸
計身多病生涯鬢易蒼征鴻向何許春意徧湖湘

春野

去郭蒼茫色鴉飛欲暮天青天一筇外白髮萬花前春
事渾相惱人情好自憐踏歌時遣意平楚漫風煙
冬夜黃給事用章宅同張肖甫賦得中字

初逢青瑣彥下榻一宵同月落棋聲裏春回燭影中放
歌還楚調扶醉有巴童上苑遙相問梅花定幾叢

暮秋即事

十見黃花發孤樽思不勝
關河秋後雁風雨夜深燈
留滯悲王粲交游憶李膺
相隨少年子走馬獵韓陵

初冬夜同李伯承過碧雲寺

竝馬尋名寺登高藉短筇
飛泉鳴古澗落月在寒松
石路經千轉雲巖復幾重
人間多夢寐誰聽上方鐘

晚眺

寒日下西陵漳河晚渡冰
孤城歸獵騎雙樹隱禪燈
野

眺心何遠巖樓老未能翻憐戎馬日愁思坐相仍

登榆林城

憑高望不極天外一鴻過衆嶺夕陽盡孤城寒色多蘆
笳滿亭堠羽檄度關河遙憶龍庭士嚴霜正荷戈

宿淇門驛懷孫方伯性甫王憲副廷瞻江少叅
伯陽

駐馬淇門夕堂空暑氣徂亂雲關樹暝寒雨驛燈孤身
計聊時序鄉心復道塗何當報知己秋雁滿江湖

宗臣

月夜聞笛

暮雨浮天去寒雲歸峽遲青山饒遠色紫菊把新枝何處風前笛頻傳月下卮關河已搖落故向客愁吹

既賦金山篇寄子與復系之此詩

寄爾金山賦登山莫自歌恐驚明月去其奈白雲何夜棹鯨波急秋衣蜃氣多憑誰慰搖落滿目是江河

渡江

秋風高不極破浪片帆輕鴻雁衝沙起蛟龍傍檻鳴愁
人芳草遠落日一江明十載風波事茫然空復情

聞雁

一枕何能得長愁至不禁魚龍殘夜笛風雨急秋砧天
入蕭森氣人兼去住心湖南有新雁作意送悲音

雨夜沈二丈至

榻有何人下君能此夜過寒蟬吳客賦哀鳳楚狂歌雨
氣千江入秋聲萬木多明朝寒浦望搖落有漁蓑

秋夜顧二丈來集

少別已殘暑相看失舊容
秋衣下風露夕草亂芙蓉
世故尊前盡鄉愁雨後重
徘徊望北斗明月照千峰

徐中行

南溪放舟

晚山青似越春酒綠如澗
中聖還徐邈登仙愧李膺
高歌傳上國爽氣度西陵
却憶耶溪上蓮舟月裏乘

入桐江二首

煙嵐行路盡天地豁然開江湧青山出濤驅明月來瀨
聲喧倚枕樹影落行杯忽自吹漁笛寒星莽釣臺
奔流千折下峭壁兩崖分樵徑衝江雨漁舟宿嶺雲布
帆林杪見水碓月中聞獨有披裘客千秋不可羣

章行人景南署中送謝山人

閒署生寒早騷人入夜過砧聲風處急客思雨中多別
曲歌楊柳初衣製薜蘿明宵如見月相望隔漳河

過桃源鋪

日日空山路褰帷無限秋千崖青欲滴萬瀑雪爭流絕
壑通雲磴懸崖倚石樓桃源如此地乘月弄漁舟

暮發滁陽

荒城一騎出落日萬峰西澗水流人影松陰散馬蹄懸
崖青欲滴芳草綠堪迷洵美非吾土翻然憶故溪

董體仁送余至固節旗亭飲別賦此貽之

自古銷魂地經過復此亭布衣交自重尊酒眼偏青柳
色春堪惜驪歌老倦聽因君懷舊侶落落歎晨星

梁有譽

歲暮集黎惟敬山房

雲木自蕭疎何慚大隱居
雨殘三徑菊塵滿一牀書
閉戶鳥聲過移尊竹色虛
滄江復歲晏誰念病相如

吳國倫

秋日匡山

采采涉江去芙蓉秋水寒
如何雜佩色難共美人看
灑淚題雲錦含情束素紈
不知彭蠡鴈曾得到長安

夏虞卿邀過梁氏園畱題

不識西園勝因君秉燭過檻隨江岸曲堂抱水雲多百
卉延書帙羣星散薜蘿松間涼籟發彷彿聽絃歌

集新橋館

遶閣雲如水入門山滿堂煙扉生牖闔空翠滴衣裳石
暝猿猶卧松高鶴正翔居然成野趣不解是他鄉

西灣晚棹

一水南湖外逶迤白石門鳴榔穿曲澗排行入深村萬

樹中流合羣山落照昏正愁高興盡漁父過清樽

秋日湖上雜詠

鷺立湖心石魚吹浦口沙數峰排霧出一葦信風過落
日殘紅蓼新霜變綠荷客星從耿耿無復照煙蓑

宿順昌

三舍昭陽道其如風雨何白雲春望合芳草暮寒多造
次停車騎蕭疎向薜蘿山城更漏永歌枕問明河

宿瞿伯明新居畱贈

萬井羅江市君家却面山徑穿池樹僻堂抱野雲間與
客看垂釣邀僧學閉關偶乘幽興入高枕聽潺湲

濟州南池

瀑水侵階上危亭背郭開分荷移小艇取石坐深苔地
迴秋陰合軒空野色來誰能共心賞懷古正徘徊

夜雨挽舟上七里灘

岸束灘聲咽沙兼石齒橫豈緣貪利涉亦復滯王程山
雨夜逾急野燈時一明客心雲霧裏懷古不勝情

魏裳

雪霽同友人登王子山

畏路誰能到幽懷我獨偏
谷中初見日樹杪忽聞泉
倚杖青山色銜杯白雪篇
交游仍舊俗風景又新年

汪道昆

院中九月桃花

孤亭依桂樹九月見桃花
白眼繁春事紅顏逼歲華
香凝蟬外露色借霧邊霞
避世甘浮海尋源好問家

漳州院中桂花

炎海憇花信高秋著桂叢衆芳蕭瑟後獨秀草亭中泣
露金莖似飛霜玉樹同明朝復長路開落任天風

桃源老桂始花小集花下

卑棲依宿莽幽事在吾廬叢桂青林外庭柯白露初繁
陰團几席薌澤沁琴書金粟前身事淮南總不如

劉少仙招看紅梅

袷服出風塵幽人傍水濱不禁庾嶺雪旋入武陵春帶

雨啼紅頰迎風啟絳唇長鏡如有約谷口到劉晨

送張虞部謫常州別駕還婺觀省

謫去應吾道流言亦世情聖朝仍得罪郎署早知名落
日梁溪棹平蕪澱水城秋風回首地淚灑逐臣纓

汪道貫

贈鄧孝孺

聞汝幽棲處澄湖一片明青衿生事拙白髮著書成澤
國堪高卧山田足耦耕華陽仙路近千古傍茅盈

鄉榜被放作

得路難如此飄零似去年曉風池上月秋水鏡中天
咄悲生事勞勞問酒錢啼猿與征鴈總使淚潸然

汪道會

小園玉蘭作花積雨未謝喜而賦此

小院孤芳早清芬玉葉寒皎如臨玉樹香似襲皋蘭
雨濯枝逾豔風吹雪未殘捲簾看不足秀色可忘餐

張佳胤

界嶺北望

北望成區脫霜空一嶺橫
野煙邊騎獵寒柝戍樓聲
峰刺高天近雲量巨谷平
微茫山盡處當日大寧城

宿黃牛峽

春到黃牛峽江辭白帝城
楚雲高不落巴水去無聲
絕塞書難寄孤舟月更明
櫂歌聽自短幾處夜猿鳴

張九一

元夕賦得火樹銀花合

火樹排虛上銀花入暗開一宵春色到萬戶夜光來對
月驚飄桂臨風擬落梅莫辭歸路晚攜得豔陽回

夏夜漫興

暝色蒼蒼至琴書燕坐幽虛窗偏駐月積雨自生秋送
酒陶潛徑裁詩謝朓樓三年淹客邸茲意未能酬

西灤

東灤與西灤青天對落虹遠山虛自應流水曲相通石
瀨征帆過江臯晚樹空草堂長好在寂莫傍丹楓

聞蟬

何處蟬聲唱隨風過短牆却疑絃裏出故傍柳邊長萬
物驚秋氣孤城入夕陽自憐雙白髮對爾惜年光

初至家陳道義瞿睿甫見過

歸及青春半芳園二仲來月生桐柏水雲斷景夷臺玉
笛梅花落金尊竹葉開今宵張仲蔚為爾剪蒿萊

俞允文

獨坐

獨坐高齋裏悠然向夕曛
天空山勢出樹斷水光分
遠色看成靄輕陰隨度雲
谷中人世隔麋鹿自為羣

蜂

春晴逢穀雨汎濫遶林篁
逐醉縈輕袂纏花獵異香
叢棲懸玉宇疊構隱金房
靈化知何術神功寄藥王

盧柟

遊成皋王城南園見水石漁艇

不作江南客空餘江上山水同
明月靜石似白鷗閒仙

徑松蘿外漁舟蘆荻間相看渾忘却無復住人寰

戲寄孟龍川

舊日浮丘伯曾將王子喬周遊乘白鶴接引上青霄大
藥留丹鼎天台度石橋不知千載後為爾一相邀

李先芳

秋日南園得深字

傲吏苦侵尋名園愜素心晚風隨徑曲秋色入林深家
釀開桑落山翁卧竹陰柘枝歌正好小妓莫傳斟

硤石舟中望宣城作

長薄帶芳洲，支江繞郡流。
潭烟宛陵夕，山雨敬亭秋。
溜急知湖口，林喧指渡頭。
依稀沙渚上，人吏待行舟。

一齋

一齋容膝處，高枕謝招尋。
稚笋初平檻，新鴉未出林。
閒情芳草地，春恨落花心。
更愛前溪好，千章綠樹陰。

江上晚行

褰帷方出郭，江上欲黃昏。
却望東原道，青山蔽縣門。
蟬

鳴月裏樹犬吠水邊村何處分漁火蘆花隱釣艚

雨中投仙姑寺

雨中投古剎江岸少人行立馬候松徑呼僧問寺名斷
碑經火盡荒草入秋平惟有楓林樹泠泠清梵聲

春思

渝州正二月日夜雨瀟瀟石瀨添新漲江楓送落潮春
催花影薄林雜鳥聲嬌楚客多歸思長天坐寂寥

灘頭

春江兩岸濶細雨片帆斜
古戍收殘市寒潮帶淺沙
風偏舟倚瀨春盡鳥啼花
桑柘依依綠漁磯三五家

暮春

和風攪亭竹稚笋欲交
加藻思添芳草春愁劇落花
簷棲黃口雀林乳白頭鴉
坐惜青陽暮空悲兩鬢華

立秋後一日助甫見訪得霜字

屏居對芳草同病喜相將
闌暑人如醉新秋鬢有霜
蟲鳴風雨夕螢點薜蘿牆
後夜看牛女還期就一觴

伯宗席對月再別吉夫得聲字

幾醉長安月因君萬里行
片雲隨袂斷疎影入簾清
小徑花生色微霜雁有聲
他時三五夕一見一含情

何明府邀宴荆山

名山堪載酒驛使暫停車
斜日長淮水春風一縣花
平崖喧立馬深樹點歸鴉
更坐莓苔上殘尊照落霞

鄱陽湖

吳人臨古渡湖水接天開
一夜南風起扁舟萬里迴
波

漂星子縣雲沒大孤臺却望蒼茫裏匡廬秋色來

吳維嶽

寶應湖即事

遠水映空浮星分蘆荻洲魚鰕湖上飯簫鼓雨中舟擊
楫成孤詠揚帆出亂流春還信可樂前路是揚州

贈沈丞之甌寧

一官知可薄其奈武夷山正好乘春水悠然出古關縣
齋峯影下吏事酒杯間計爾傳詩日初遊九曲還

立秋後一日雨中登樓

涼雨蕭蕭下江城
昨已秋潮聲入官舍
山色帶書樓鼓
散堂前吏帆歸海上
舟喧聲聽晚市聊用遣鄉愁

歐大任

送張治中孺覺赴望都

誰似張京兆名駒快月題驛程
揚子外官閣秣陵西射雉
蕪深翳藏烏柳暗啼詞人非六代
莫更唱前溪

夏日同劉仲修李惟寅諸子出城訪丘謙之得

飛字

西來初弛擔策馬問郊扉以我思鄉淚沾君去國衣齊
梁遊已倦江漢賦將歸一葉秋風裏何年向洛飛

晚霽過梅關

千峰留晚色迢遞出梅關日向猿聲落人從鳥道還中
原開嶺徼南海控甌蠻萬國來王會秋風戰馬間

次韶州

臘月渡湏水繫舟韶石間山高連漢徼樹遠接秦關禹

旬通諸粵堯封盡百蠻九成臺下路猶想翠華還

夏日同陳世鳴憑虛閣讌集

故事南朝日風流憶謝墩薜蘿延翠靄簫鼓送黃昏鍾
阜深藏寺玄湖曲遠村帝城瞻王氣猶自護朱門

得黃希尹金陵書

送君白門去五載尚為郎握手知何日題書問故鄉潮
聲江浦雁秋色石城霜一葉西風外無因到洛陽

除夕寓九江官舍

錢歲潯陽館羈愁強笑歡燭銷深夜酒菜簇異鄉盤淚
每思親隨書頻寄弟看家人計程遠應已夢長安

李符卿伯承左遷亳州夜同黎秘書惟敬吳侍
御約卿往餞得長字

殷勤一尊酒相送意何長薄宦投濠上歸心向濮陽使
星珠斗外卿月玉河傍持慰山東客銜恩異夜郎

龍舟浦

簫鼓中流發秋風散浦煙琳池新樂府汾水舊樓船賞

勝觀濤日游非習戰年甘泉思扈從回首濯龍川

南臺

下有水田村舍先朝曾於此觀稼

西內風煙異南臺見水田艱難曾稼穡淳朴自山川農舍朝炊裏江鄉夕照前穀蠶勞睿藻幽雅定同傳

同黎秘書劉山人遊西山經玉泉山池亭望西

湖

竝馬今朝路西行訪石經山泉浮鉢綠湖草映袍青積玉迷春澗飛花入暮亭十年江上客煙雨憶揚舲

黎民表

彈子磯

茲嶺何綿亘孤根下杳冥雲光盪鳥背水氣雜龍腥蜀
道攢為閣廬山疊作屏定知人靜後風雨泣精靈

春夜同童子鳴集潘少承館

向夕衡門掩吳中客子來長河翻月上斷柳逐風迴小
飲憐春盡繁花愛晚開漢關吾欲去刻燭更徘徊

冬夜同張元易過顧叔潛得紅字

櫪馬苦嘶風徘徊戀竹叢寒聲御溝水月色建章宮小
袖禁花豔衰顏借酒紅他年文字飲能復憶城東

蘇子川宅觀芍藥

為掩羣芳色開花獨後時青_北承露蕊紅妥出闌枝綽
約東鄰子風流鄭國詩合歡還有恨名字是將離

豫章江行

路已經吳越舟還遡豫章洪濤撞遠岸獨鳥下危檣地
近長沙濕山連粵嶠長所思非遠道猶復歎殊方

楊祠部宅送陳玉叔之淮安

故人遙擁傳炫服且還鄉芳草經吳綠清淮入海黃離
襟分夜月官燭照西堂祇益風塵夢隨君郢路長

紫荊關

徑轉蛇盤險雲連鳥去長山桃微著紫沙柳不成黃重
鎮臨天府神功劃大荒金城誰獻議老作尚書郎

魏允中

華教夫歸無錫便問嵇泰峰先生

長安有知一問子何為還不奈思鄉淚猶多戀別顏浮
雲連冀闕芳草遍吳山遙憶寧親暇焚香晝掩關

過鞏昌太守許公邀飲城東樓

豈不嗟行役終然戀舊遊天涯相對酒日暮更登樓露
自先秋冷山仍遶郭幽別來能幾日白滿故人頭

徐明府邀飲百泉池

獨下山頭寺雙過水面亭淺沙依鷺白澄景入峯青點
燭回殘日移舟帶曉星古臺清嘯寂未與世人聽

胡少陵之建康

相逢知何處相送復長安匹馬雲中去孤帆天際看江
流漾牛渚山氣鬱龍蟠寂寞談經宅何人共歲寒

周生歸黃州

涼風吹客帆落日過湖南握手空相送離心不可堪片
雲縈楚岫一葉下江潭何地偏相憶朱家酒夜酣

胡應麟

贈高深甫

最憶高常侍生平樂事饒千金求驂駟十院貯紅綃古
蹟畱三代新聲和六朝湖頭明月滿無夜不吹簫

自嚴灘至新安途中紀興

一灘高一丈

諺云一灘一丈新安天上

灘盡到天都疊嶂雲飛動陰

厓日有無辛夷殘紫落躑躅亂紅敷獨少行雲廟分明
入峽塗

徐獻忠

自小晦至西晦與曹新昌議民事

行縣淹朝雨盤山轉路遲溪聲連壑起雲氣併峰移候
鳥催耕急梯田貼石危農官方在野端為有年期

癸卯應詔北上晴泊清口

野泊斜陽近江村亂水明帆檣千客語見雁一羣輕凍
噉寒沙淺風離古燒平昔年淮上月猶自照韓城

奉懷射陂諸子

久別烏程令經秋思轉微林光暮煙發菊氣早寒歸出
縣看山近開衙報客稀還將蕭瑟意遙逐白雲飛

寄南江獄中

怪爾憂時急雲林阻道風人間傳抗疏誰復見書空萬
死恩方重生還事亦公悲淒老親意悵望五湖東

徐伯虬

同九峻顧子訪漳河岳山人

多君棲鄭圃玄室白陰陰此日逢迎處高天倚樹吟竹
香明幌靜山色暮簾深相送情無限餘音碧水琴

顧聞

和岳子嵩山草堂宴集

綠樹覆滄浪高齋敞夕陽鳥殊聞法曲花故憶明妝碧
酒銜風急清琴拂水長況逢巖壑侶同醉白雲傍

晚

岸幘秋堂小臨流暮雨清羣峰傾鳥背落葉帶溪聲林
日高低下川虹斷續明棹歌何處發應是采蓮行

清明日過楊村

楊柳蔽楊村桃花古渡昏清明猶作客白日正消魂天

地催時序關河仗酒尊何為千里夢一夜落吳門

孫宜

湖上雜興

地遠山圍宅城孤市遠村菰蒲侵草閣鷗鷺到柴門野
霧峰全暝湖煙渚半昏坐憐漁父過隨意倒芳樽

同諸友遊郭曲

地勝因湖得堂幽對野開晚風吹笛起秋水挹城迴溪
友留魚去鄰翁送酒來為言九日近引客試登臺

十三夜月東謝子

今夕江樓月能添昨夜明
苑雲寒自斂城角霽尤清
露警花間鶴風微樹杪螢
百壺高興在端坐待君傾

陳津

螢

分將光自照肯擬暗中投
寂歷依書幌分明點客舟
露涼深映竹風定直衝樓
不恨飄零晚終隨大火流

黃魯曾

肺病

肺病因何劇龍蛇久背時小槽誰貰酒弱翰漫題詩貴
轍過難結仙舟載已遲春來花鳥意獨飲向茅茨

黃省曾

榻上

短榻吟還可幽居眺得兼燕回花淡淡蝶泛草纖纖遲
日難過屋輕雲不滿簾所歡能到此明月共須淹

泗州寺

化塔曉言攀禪樓訪閉關煙生屯匝柳雲長合前山御
酒靈襟暢談經寶思閒紺園星緯地淹對不知還

虎丘雨集

暮雨過前溪春雲四野低望開山更合看出樹重迷池
外花交吐巖間鳥半棲煙蕪千里色彌使客心悽

唐鉞

江行

客計方歸越征橈更背吳風螢臨水亂江月向人孤洲

已過迷子山行及望夫可憐清夜色強半在長途

黃中

不寐

多病眠常早移燈近卧牀重翻經驗本那有斷情方樹
響秋先到窗虛月正涼寂寥愁不寐更漏一何長

劉成穆

城南送友

送汝歸南國燕山正早秋獨傷千里別同憶五陵游漢

殿相如賦吳江范蠡舟相思同易水日夜自悠悠

高應冕

江村晚眺

荒村沈夕照煙樹幾人家野渡迎潮急寒山帶月斜
漁歸無遠市雁下有平沙寂寂秋江晚芙蓉自落
花

渡湘江有感

扁舟復何去五月下瀟湘遙望蒼梧迴還憐楚水長
暮潮下野渡遠樹帶殘陽渺渺雲山外蒼茫隔故鄉

陳芹

送黃淳甫還吳門

憶君還故宅追歎昔年違
花倚新枝笑人隨舊燕歸
川原春日澹桑梓暮陰稀
挂壁餘孤劍依然夜有輝

九日長干寺別友人

精舍長干遶清池
曲路通雙橋雲影上
疎雨梵聲中
晚岫沈孤翠
秋英吐豔紅
嘉辰聊一醉
世路漫西東

季冬溪閣別張幼于

即見雕欄外絲絲柳拂頭水平桃葉渡花礙木蘭舟定
擬尋春至仍須下榻留祗憐君去日雪灑翠雲裘

薛欽

句容道中望茅山

翠峯盤江甸遙天紫翠分風塵應不到鸞鶴自為羣曉
徑連青靄秋山遍白雲可憐句曲望不見華陽君

雞鳴寺

古寺浮仙嶂層甍近帝家洞香流石乳僧午飯胡麻金

剎盤飛鶴丹池聚浴鴉俄聞孤磬發蕭颯滿煙霞

吳節

登仙臯亭

仙臯孤亭敞憑高發興新風帆斜入浦雲樹曲通津丹
井迷芳草清池覆綠蘋月明歸去近涼影忽隨人

方元煥

園居

兀兀坐長日行園怡晚晴畦蔬經雨足山水到雲平野

老水邊語輕風林際生年來知抱甕猶聽轆轤聲

郭文涓

夜懷

疎燈孤館寂落木萬山空夜色誰家月秋聲何樹風鄉園歸雁外身世轉蓬中祇益離羣意淒然思不窮

馮行可

玉泉山

野亭花歷亂春色晝霏微柳暗雲初合山深鳥不飛寒

流鳴玉澗空翠襲人衣却愛經行處閒僧埽石扉

秋意

清秋新雨後天氣晚生涼月散虛中影風飄空外香
鷓鴣聊暫息鴻鵠相高翔作客驚時序鐘聲出禁長

憶江南偶成

人生冀安樂萬事更何知五畝青山宅一灣明月池
梅
花繞屋種橘柚當窗垂野老時相問悠然物外期
西園竹萬箇南澗杏千株魚樂當堦躍鳥歡隔樹呼雲

過開錦繡風度送笙竽一枕邯鄲夢人間事有無

許邦才

晚行即事

秋陰天易暮行客倍生愁江曲明漁火山椒隱戍樓密
林驚月黑疑路怯星流犬吠荒村近喧呼隔岸舟

舟中

客子常明發霜天正寂寥移舟星在水解纜月隨潮往
事流波駛歸心帆影搖更堪聞過鴈蘆荻共蕭蕭

戎來賓

郊居即事

作吏才偏拙為園意頗深
風塵元畏路山水是知音
徑曲叢篁密堂虛澹月侵
平生甘放浪自合早抽簪

梁柱臣

寄懷蘇雲谷逸士

吾鄉隱君子質素古人風
性豈琴書癖身將猿鶴同
捲簾山閣暮策杖海雲空
一別麻源谷相思桂樹叢

孫樓

郊西詩

上苑春偏麗西郊更可憐
輕塵花半妥斜陌柳初眠
綠樹鶯聲外青山馬首前
夕陽南北淀彷彿太湖田

邵圭潔

村舍

買田依谷口臨水啟柴扉
家近溪橋得村深竹樹圍
聽鶯春自往騎馬夜能歸
聊畢平生志還來築釣磯

丁一中

初秋月下小集限韻

共集高齋晚清樽照眼明雲開天際月秋入海邊城未
盡追懽意還驚欲別情莫辭終夜醉況是瘴煙清

賦得征馬嘶送客向朔方

馳馬向榆州蕭蕭鳴未休朔風千里道落日萬山秋影
亂驕行色聲長帶別愁丈夫思報主日夜隴西頭

葉春及

題陳明府園亭

背郭名園好青山帶綠谿檻花經雨濕亭樹拂雲低
靡靜隨風掩林深自鳥啼寥寥蒼野裏何異鹿門棲
朝市違簪紱林塘傍芰荷雲歸三徑遠幔捲四山多
松韻聞琴瑟花容豔綺羅更憐門巷遠車馬少經過

小砢石臺

倚劍孤城暮登臨萬壑秋潮平沙岸失月落島煙浮
白鹿通夷國黃雲滿戍樓南征斷消息橫吹不勝愁

訪詹咫亭先生巢雲書院兼呈社中諸友

巢雲高不極飛閣倚雲開樹杪滄溟盡尊前紫翠來江
湖雙涕淚天地此樓臺縱有終焉計能忘國士才

惆悵出門去徘徊流水間菊花深復泛桂樹晚重攀返
照孤城斂寒雲大壑還明朝羈物役清夢到柴關

吳景明

赴西州任道中即事

灘險飛流急林深毒霧遮溪行朝避蜮山宿夜防蛇屋

市枕榔樹籬編茉莉花從知邊徼地風土異中華

鄧元錫

初夏登眺天峯

江城開宿雨孤嶠共躋攀龍氣留蒼壁鶯聲響碧灣危
峯斜帶郭幽徑曲盤山不淺東林興迢遙未忍還

李贄

初到石湖

皎皎空中石結茅俯青谿魚遊新月下人在小橋西入

室傾尊酒逢春信馬蹄因依如可就筇竹正堪攜

潘緯

送友人北遊

樽酒慰行軒交深敢贈言經過鄭莊驛好問孟嘗門一
諾休輕許千金未是恩年來長送客此意不曾論

夏月過余松泉先生溪園

花榭竹為垣幽陰坐處繁遙疑原上日不到水邊村山
雨帶雲集松濤清晝翻往來三徑裏何地有囂煩

冬夜奉懷從兄汝和時在江西

予行江水北君行江水西兩鄉千里隔一夢幾迴迷
雨雪連天遠梅花落月低所思何處在殘夜聽鳴雞

過蔣南泠翁大參休園喜鴻臚諸昆載酒留集
蔣生風雅存異代馥蘭蓀修竹仍三徑垂楊自一村
啼鶯呼過客幽草映閒門舊識羊求侶重憐載酒樽

官莊春暝

一徑掩蒿蓬孤村煙靄中鳴蛙出水曲宿鳥隱花叢
高

樹留殘照遙山映暮空無人伴幽興招月聽絲桐

初夏同王應鳳余日章汪以仁以敬過余子玉

園居

背市園居寂到門芳草深呼童出貰酒留客坐鳴琴鳥
作辭春語松生入夏陰求羊無夙約開逕自相尋

項元淇

同陳白陽登閣

月宇臨清桂星筵拂絳河已投車轄飲無倒接羅歌砧

杵催秋急風煙向晚多春波門外路乘興數經過

周錫

海豐道中

長夏苦于役炎風吹鼓輦山深榕子落雨急鷓鴣啼野
渡從流下斜陽在竹西極知行路險愁殺嶺雲低

茅屋

茅屋自成趣況丁離亂中敲冰兩孺子曝背一衰翁客
至村醪薄樵歸樹葉空三江十萬戶安樂幾人同

張循吉

軍城秋夜

寂寞軍城暮浮雲暗斗杓戍樓人未散絕塞馬仍驕夜
雨千門冷秋風萬木凋籌邊王相國金甲未應銷

錢元鼎

偶出

卧榻淹三伏肩輿出早秋青溪通小市香稻滿平疇有
約過鄰舍忘機對水鷗已成迂嬾性身外更何求

周沛

餞沈懋學時萬參戎復起淮上

爾去當殘臘其如霜露何到時春草徧隨處故人多脫
劍留燕市題詩贈汨羅淮陽舊遊地取醉一高歌

丘雲霄

吉溪

游子悲無褐寒風吹短楂問魚沽酒路隨犬到田家茅
屋依山靜溪橋逐水斜逢人皆荷蓀相笑失生涯

江晚

帆勢迎風疾灘聲入暮喧
漁燈出疎樹客路問前村
野鶴沖煙迴山花帶雨昏
寒江何處宿幽思未堪論

施漸

冬日遊天竺寺

緣湖始忻往遐覽歷幽尋
山到不容路雲藏猶有林
堦前寒澗落榻下白雲深
積雪千峰裏寥然空世心

荅王仲山見訪溪上田居

同歸五湖住一水見君家漁父迷初路居人認落花禦
貧多種菽為圃却宜瓜共是求羊侶往來忘歲華

暑中閒述

宿雨未為深晴光已滿林微風松際歇涼靄竹間沈地
僻容身散交疎少物侵常嫌子桑戶今日廢衣衿

早春齋居漫興二首

此地寓來僻清渠正繞廬數畦聊學圃一徑不容車圖
列僻間岫書翻几上魚謀生已無術元不慕相如

靜裏心常覺塵中人豈知柴門獨掩後春草復生時澤
國為漁晚江湖好道遲總能談寂寞祇費子雲辭

和萬吳二明府夜集俞汝成讀書園

去市未為遠到門終是幽小池堦下滿嘉木雨餘柔鳥
影高臺近春香各逕浮不妨車馬客暫此共林丘

李奎

湖上

錦帳開桃岸蘭橈繫柳津鳥歌如勸酒花笑欲留人鐘

磬千山夕樓臺十里春回看香霧裏羅綺六橋新

與客遊北山偶過普福寺尋葛洪丹井

古寺隨緣到雲霞晚自閒僧房開竹裏仙路入花間斜
日明秋水薄煙凝暮山偶探勾漏跡惆悵欲忘還

萬表

夏日飲許員外山亭即景

一亭梧竹裏迴出市塵間石逕緣蘿入江峰對座間海
雲朝屢變山鳥暮雙還別去衡茅下思君嬾閉關

劉銳

和徐東濱

何處幽棲好城西有茂林
山來當戶翠竹長隔牆陰
哺子飛梁燕窺魚下水禽
閉門無所事赤日任流金

張元凱

春日遊西苑

宣室臨西苑靈臺對藉田
宮鶯迷綠雨殿馬飲清川
柳引金堤直松含玉殿圓
先皇受釐處寂寞鎖春煙


子夜

花柳發韶年妝成子夜妍
弄簫成豔曲調瑟豈哀絃
翡翠巢金埒鴛鴦撲錦纏
不將銀燭滅看取玉人憐

湖上歸

野寺垂楊外湖陂亂葦間
翠含千樹雨青露一痕山
果熟喧童口桑稠碍女鬟
漁舟小如葉載我洞庭還

御選明詩卷五十九



總校官庶吉士臣侍朝

校對官檢討臣蕭九成

謄錄舉人臣張昱

欽定四庫全書薈要

集部

御選明詩卷六十

詳校官原任主事_臣李斯咏

欽定四庫全書薈要卷一萬八千五百六十

集部

御選明詩卷六十

五言律詩十一

李元昭

送周虛巖歸吳門

返棹歲將晏
離亭酒亦深
島雲寒沒影
江日凍生陰
莫惜飄蓬跡
應傷折柳心
丘中別同調
聊復理鳴琴

過吳判官村居

殘虹明遠浦片雨洗平疇戶敞從雲度階空任水流醉
因花影勸歡為鳥聲留日暮渾忘返高眠傍斗牛

狄從夏

月夜同劉天山作

孤館寒燈夜相看聽晚笳清宵醒客夢明月落梅花碧
海潮聲急清霜鴈影斜不堪憐歲暮况復是天涯

奚汝嘉

旅懷

十日雨初霽一年春已殘苔痕蝕徑滑草色釀陰寒昔
悔從軍易今悲作客難殊方有桃李能得幾回看

陳鶴

太倉除夕席上呈友人

頻年愜遠遊歲晚忽牽愁底事故鄉淚偏當今夜流柔
風將報柳殘燭更明樓君醉且休別同予送曉籌

泊京口望金山寺

南徐一片石千古柱中流繞樹開僧舍緣空結梵樓疎

燈明水底落月挂潮頭向晚禪鐘起風吹到客舟

夜坐見白髮寄別朱仲開張甌江

坐久北風起江聲帶遠沙客愁初到鬢鄉夢不離家林
靜無殘葉燈寒有落花懷君夜難寐別緒轉如麻

過唐荆川太史隱居

唯君愛嘉遯結屋向江村遠月長隨棹殘潮自到門心
無時事累家有古風存已得川中樂都忘河上言

送袁節推奏績北上

斜日半帆明西江浪正平風雲雙闕路吳越兩鄉情樹
綠沉山影天空落鴈聲孤舟漁浦夜共語一燈清

題楊法部容間閣

閣傍江城外窗開雲水間祇因塵境遠自覺主人閒日
落見歸鳥月明看遠山移船候潮至相送野僧還

寄金子坤

思君不可見漸覺歲年過世事猶如此生涯近若何天
長紅樹沒雨後亂山多何日金陵道相攜一和歌

高郵贈龔山人

近苦江東水轉憐
淮北居入秋嘗白稻
留客鱸青魚樹
柵春收犢穿湖夜
灌渠期君結鄉社
同著養生書

陳第

江心寺除夜

偶過江心寺何期
又歲除百年俱逆
旅信宿即吾廬
岸隔遙沽酒廚寒
剝煮魚客遊隨處
好鬢髮任蕭疎

客中立秋

蒸濕前朝雨淒涼今夜風秋聲先蟋蟀露氣到梧桐頓
覺絺衣薄尤憐旅橐空潞河問舟楫明月向吳中

閩關旅夜

已是吾鄉土離家尚十程疎窗通野色孤枕傍松聲搖
落秋難賦悲歌夜不平僕夫催曉發燒燭待雞鳴

南岳舟中

吳門一水接楚塞衆山連書史同昏旦江湖且歲年洲
迴蘆莽莽檣動燕翩翩何處為南嶽雲開望杳然

陸采

十六夜與朱都二子酌月承天寺

蘭若延佳賞，蕙肴留好賓。共聽聯袂曲，不見折香人。僧
掃苔間坐，雲生頭上巾。石牀渾失寐，清照一吟身。

李言恭

曉渡

煙樹曉棲鴉，長汀帶白沙。中流聊擊楫，新水快浮槎。雲
與人爭渡，春隨客到家。遙知飛綵日，開滿石城花。

曉發應城

古道風煙接天涯曉夢迷猿啼千樹露人過一村雞遠
浦餘燈暗隔林殘月低此時有高卧予獨媿羈棲

漢江城樓

樓閣依山出城高逼太空帆檣入煙霧波浪過簾櫳燈
火深林裏星河流水中人家半漁者簑笠掛秋風

花朝

二月寒猶峭燕山雪未消春來無草色病裏又花朝鴻

鴈鄉書斷關河旅夢遙
武陵溪上約今已負漁樵

送陳玉叔郡守淮陰

別思深難遣離魂暗欲銷
人隨流水去心共暮雲遙
野市懸高岸江城響夜潮
所嗟相憶處風雨正蕭蕭

呂時臣

夜懷

起來喧不減策策生涼風
月暗蟲聲裏人孤樹影中
南垣寒尚早北地候難同
想到鄞江上秋花滿舊叢

留別謝少府子魯

木落見中州遙連白帝愁
黃河臨斷岸明月上孤舟
作客已多歲還家又暮秋
思君西下日寒葉滿江流

到家苦雨寄城中諸友

歲晏兼貧病歸心詎可論
寒潮冰下咽飢雀雨中翻
野徑蒼苔合山窗白晝昏
還家已十日愁絕舊柴門

秋田為李生得衣字

明農兼課子田舍有書幃
穠穠極霜初下雞豚秋正肥
西

風菰米飯落日豆花扉已得遺安計無嫌老布衣

金山寺

萬古一卷石東南何壯哉半江截吳楚兩岸瞰樓臺僧
飯蕪城乞人煙鐵甕來春深龍聽去風雨帶潮回

鄭若庸

王內輔三泉將命太嶽

神嶽蟠中極凌虛勢自孤星辰低絳闌雷雨護清都山
色遙連蜀江流直入吳金箱有靈秘到日佩真圖

顧聖少

送李汝學還上黨

傾蓋同為客，攜尊復送君。
悲涼誰作賦，南北此離羣。
坂沒羊腸雪，山橫熊耳雲。
相思豈無鴈，可待九秋聞。

徐渭

懷陳將軍同甫

飛將遠提戎，翩翩氣自雄。
椎牛千嶂外，騎象百蠻中。
銅柱華封盡，昆池漢鑿空。
鴈飛真不到，何處寄秋風。

聚法師將往天台止其徒王公菴中余為留信
宿

欲向天台去先為剡水尋秋行萬山出夜宿一菴深燕
語調花氣猿啼帶講心年年石梁興送爾並沉吟

順昌道中新晴

解轡投山屋束鞍聞曙雞風雲畱宿雨花草踏晴泥曉
峽喧谿路春沙泛馬蹄遙知武夷曲只在亂峯西

沈明臣

白雲溪上

山源何窈窕五色石溪清橋壑皆雲氣空山惟水聲懸
崖無鳥過古路少人行高枕潺湲上長懷非世情

雨罷

睡起雨初罷出門天復陰亂雲垂樹濕流水到花深帆
過高於屋鷗飛只在林天邊漁艇子日日可幽尋

包十碧岑樓分韻

水上樓偏好尤宜對夕陽樽前開睥睨簷際宿帆檣浦

樹潮來沒江天鳥去長高情遲明發鼓柁下橫塘

野炊

水竹誰家是來堪一繫槎漁樵雲裏逕煙雨燒前花怪
客喧籬犬驚人起樹鴉柴門開闕寂面面逐江斜

馮咸甫有贈依韻奉答

世有小馮君才名到處聞雲間一邂逅天上幾人羣自
笑匆匆甚尤憐脈脈分相思何所託江樹倚春雲

即事

古道出吳淞垂楊拂寺濃
水雲低晚照殘雨逗疎鐘
渡海帆初挂尋山月正逢
客心殊自喜手摘翠芙蓉

何處

何處放船好水深雲欲低流
漸莎草上落日布帆西雨
脚只在樹鷗飛不過溪買魚炊白飯
醉聽巖猿啼

越中

樂遊何處好最愛越中山人坐
午溪寂鳥眠秋水閒雲
橫獨樹上雨在數峰間欲作蘇門嘯
蒼茫不可攀

渡峽江

雨後趨官渡春陰野望迷江渾諸水聚雲雜亂山低樹
濕鶯猶困風酸馬自嘶王孫行處草無奈故萋萋

張二吉父袁九齡秀才攜酒至吳山館

桂館諸峰上蘭樽二妙來大江開夕照陰磴積秋苔蟬
響流風急蟲聲隱月哀所嗟人散後鄉夢只東回

過高郵作

淮海路茫茫扁舟出大荒孤城三面水寒月五湖霜波

漫官堤白煙浮野戍黃片帆何處客千里傍他鄉

行樂

行樂湖南樹清陰為颯然微風荷葉上乳燕杖藜前草
合幽人路花深病客天所知良可待獨往信孤煙

送張丞纁赴睦下邑

君向嚴陵去雲移畫舫低驛程疎雨外山色大江西訟
簡知花落官閒聽鳥啼却忘身是吏隨意坐青溪

王寅

送鄭信之遊大梁

南客辭鄉邑遙隨北鴈歸
春風寒似臘吹雪濕征衣
書劔過淮水關山望宋畿
銅駝舊遊路花柳正芳菲

康從理

歲暮泛彭蠡

曠望極平川遙心自黯然
空煙疑有地遠浪不分天
暮色孤帆外寒聲落雁邊
年催長路客歸思倍堪憐

觀音閣

古寺夕陽邊憑虛思渺然江聲猶楚恨山色自吳年宿
鳥回清磬孤舟逗野煙長廊燈影寂徐步禮金仙

陳淳

東園

獨酌林皋下厭厭不計籌似能添野興還可慰羈愁月
色十分好蟲聲一片秋壁間何物在寒氣隱吳鉤

彭年

奉同衡翁太史諸公游子慎山

仙路披林入星橋接漢通
蒲萄新漲綠蟬螭欲飛紅
海鶴鳴花外山雞舞鏡中
清商移小部明月幾回同

晚過橫塘

輕棹乘朝霽飛樓渡石梁
山容明罨畫天影靜滄浪
燕拂柳絲弱鶯啼花氣香
春光正韶麗況復古橫塘

大石

陽山青不斷陰壑路疑窮
鰲螭凌松杪駉駉歷桂叢
隔雲分野綠穿月逗中空
勝絕流孤賞疎鐘殷梵宮

陸治

張左虞過訪漫荅

學稼甘吾老看花喜客留
鶴鳴童錯應鶯語伎先酬
山水將身隱圖書足卧遊
君家雙玉劍尚在匣中不

錢穀

夜登虎丘次韻

遙憶梅花閣還思修竹林
煙迷山逕宵雲鎖石苔深
香界期重宿筠亭擬更臨
悠然停采艫燈火晚陰陰

居節

雨後過雲公問茶事

雨洗千山出氤氲綠滿空
開門飛燕子吹面落花風
野色行人外經聲流水中
因來問茶事不覺過雲東

雨夜聞雁

釭斜寒照竹山靜雨圍牀
雁到秋如許人愁夜未央
江天將隻影霜信過重陽
小夢知何處三湘煙水長

宿道院

解索神仙宅青蘿小洞房何人識紫氣無夢熟黃梁牀
拂如雲石簾飛似水霜不知寒漏永消盡讀經香

雨中

習性未能忘擁書日滿牀四隣分樹色一徑借溪光聽
雨支高枕下簾留晚香蕭閒生意在庭草過人長

晚坐

鴉背夕陽盡柴門暮色初山寒漸風露人語半樵漁落
葉聞碁急蘆花映日疎年年楚江上不見雁將書

周天球

金陵七夕贈皇甫司勳

片雨明河拭雙星
閣道臨論歡天上
別驚候旅中深夕
吹催飛藿商聲動
早砧城南倦游客
同折此時心

王懋明

同鴻山公過思閒草堂

黃葉滿村巷幽人
成隱居水田禾刈
後家甕酒香初地
僻鳥羣逸天寒山
翠疏衡門笑語罷
新月映前墟

湖上隱居秋日漫興

寂寥桑柘外，秋日賦閒居。
天氣清行樂，溪聲和讀書。
每於幽事遇，不覺世情疎。
近復增頽情，經旬髮未梳。

春日懷金陵舊遊四首

神樂觀

仙觀青門外，嘗從金馬過。
桃花霞際吐，黃鳥日邊歌。
晚酌醒池水，春衣煖徑莎。
自聞清樂後，長使夢雲和。

雨花臺

長干風景地臺上每淹留雲樹空濛色煙江縹緲流
前芳草暮鐘外雨花收夢寐城南路何年尋舊遊

莫愁湖

去年脩禊日曾往莫愁湖心醉歡娛地春隨歌詠徒
風花香不斷煙柳弱難扶一別無由到空悲歲月徂

靈谷寺

匹馬依叢薄曾因訪化城松深藏梵響谷香蘊秋聲
畫壁巢禽污蘿扉倚樹成老僧招引處猶記說無生

姚咨

山臺曉望懷僅初不至

客舍起常早曠然思遠遊
彌傷歲華晚來眺高臺秋落
葉滿山徑寒風吹故裘夫君獨不至湖水空悠悠

周詩

理山避暑竹亭有作見寄次荅

阮生能抗俗嵇子得長林
僻境寡人跡閒窻多鳥音
蒼藤挂朱日短榻卧重陰
羨爾忘機事雲山意已深

靈隱寺

靈隱何年寺青山向北開
澗流元不斷峯石自飛來
竹覆空王苑花藏大士臺
冥探有玄度莫遣夕陽催

孫父

和皇甫子浚韻送周以言

有客今朝別無家何處還
隴梅頻望寄衰柳不勝攀
江漢淹高節乾坤亦厚顏
故人如問及雙鬚已成斑

唐詩

九日登牛首山

牛首登高處黃花細雨前山深寒似臘江遠淡於煙寶
剎珠光淨金陵王氣連六龍曾駐輦聽話武皇年

沈仕

村居春日

柳堰迷丹日蓬扉啟綠煙人間啼鳥外興劇落花前野
色連三徑山光滿四筵鷓鴣如可解堪作酒家錢

岳岱

癸未八月一日至山居

別業諧新跡林廬返故情竹添秋徑密花洗早窻明地
遠千家市山啼八月鶯尋源從稚子石澗繞門清

方學漸

白雲巖

磴道斜飛瀑巖花半入雲望中孤鳥沒天外一江分竹
柏山樓色旃檀石鼎熏軒然發長嘯清興好誰聞

張士瀾

送人還京

臨歧一別酒惆悵故人遠
落葉雨中滿歸舟江上稀
路將天欲遠帆逐燕同飛
去去還鄉樂無勞淚濕衣

陳鳳

江上

長風吹古堞落木下滄波
孤月動寒幌暮煙生碧蘿
客懷聞雁急人語入村多
又宿秋江上依然舊釣簑

吳擴

同白平溪宿古竺

天竺古名林幽期晚共尋澗陰藏宿雨松籟
蒼鳴琴曲
笕分泉細荒除落葉深中宵無一語愈覺契禪心

汪寬

鸚鵡

被寵翻遭繫能言太逼真主恩非不厚野性詎能馴
去
國長憐爾呼名輒應人江南盛雲木何似隴山春

葉一清

遣興

頗怪逢迎嬾經旬不出谿草堂一夜雨新漲忽平堤翠
篠吟風細青霞壓樹低滄洲意不淺獨坐領鳬鷺

程泗

東原

翠竹孤村合黃花曲逕饒租完無吏過酒熟有鄰招碧
澗當門釣青山隔岼樵自慚非世用長得任逍遙

戴巖

得子秀兄避寇消息

問訊東吳使秋來尚避兵一身依短劒數口傍孤城旅
食應無定歸舟未有程此時正愁絕天末斷鴻鳴

葉杲

旅次江夏

歲暮投南楚蕭然一旅身江山遙對酒鄉里少逢人細
柳舒殘臘疎梅報早春故園歸未得物候倏更新

汪子祐

獨行

日杲秋猶暑林棲鬢欲華
獨行銷白晝得意見黃花
稻熟莖莖穗薑肥寸寸芽
竹堤香漸近水次有漁家

李敏

題沅口吳逸人山居

巖泉鳴翠微沅口舊漁磯
市遠修琴去雲深採藥歸
窗扉樹雞柵籬籬落曬牛衣
世事無心理長鑱老蕨薇

郭第

錢塘雨泊

一片迎潮雨錢塘泊岸逢煙明六和塔雲暗兩高峯茶
熟篷窗火香殘野寺鐘湖頭舊遊路濕翠想高松

出楊子橋喜見江南山色

小艇淮南道經過無限情可憐楊子渡不見海潮生水
斷瓜洲驛江連北固城漲沙三十里樹杪亂山橫

張文介

九日風雨登吳山亭子

今日復九日自憐猶未還巖亭足佳菊風雨亦躋攀
漠煙中寺冥冥海上山鄉園渺何處空佇白雲間

余慶

送吳隱君南還

可歎論文日翻成餞別時空江憐歲晚遠道念歸遲
行色關鴻雁鄉心挂柳枝殷勤一杯酒相勸復相思

陸光宙

歸雁

萬里衡陽雁春來又北征誰憐失羣影故作斷腸聲朔
漠風猶勁關山月自明素書吾欲寄須到維陽城

姚充

興善寺訪戚希仲養疴西林禪房限韻

橋分龍藏北水接馬涇西一棹通祇苑孤筇引曲堤梅
同殘雪映竹覆濕雲低不淺陶潛興清尊許共攜

王叔承

荆溪游櫻桃園

珠林光萬點紅亂野園芳艷奪桃花彩甘驕荔子漿女
翻雙腕白鶯溜一衣黃問是誰家勝江東顧辟疆

雨中看垂絲海棠

江花低拂座窈窕雨中枝濕翠籠芳樹嬌紅裊碧絲驪
山清後處越水浣紗時可奈風前態迷春映酒卮

新涼

新涼樹杪來風色動銜杯簷晚蜻蛚挂籬晴蛺蝶迴一
溪秋水到滿屋萱花開無限江南意吳歌醉嬾栽

冰出吳江

臘去三朝雪春去十日冰
櫂鳴寒玉破舟白浪花凝
客夢天無際人煙樹幾層
吳江沙月暝雁影落漁燈

黃姬水

郊居

卜築傍寒郊機心久已拋
圓花蛾作繭門樹鶴為巢
但自能齊物何須著解嘲
竹窗僧去後明月滿衡茅

訪文德承攝山耕寓

訪爾巖棲者迢迢披荔從間扉挂層瀑危路隱千峯白
首鸛裘客青山石戶農浮生能幾日一別十年逢
除夕與金子坤郭次父登治城後集小寓

散步崇崗後明燈綠酒初那堪惜除歲又復感遺墟寒
析巖城急春星短屋疎明朝問生計猶是一牀書

王穉登

寄方子時

避人成獨往一室謝喧囂泉近書聲碎山深酒價高千

峯對茅屋終日聽松濤五畝瓜園地躬耕莫憚勞

白丈自杭州歸要遊天池

桃花零落盡游賞與君同僧住松聲裏鶯啼石壁中巖
光晴處紫池色晚來空莫把琵琶奏尊前有白公

陳僉憲園林

十畝瓜園地因之早挂冠衣裳竹裏翠門巷雨中寒夕
鳥留歸聽秋花耐醉看多君下榻意不忍負餘歡

看梅過鄧尉山中二首

人似梅花瘦舟如蘭葉長青山十畝白流水一春香種
密人難入開齊夜有光苔枝容我折野老不嗔狂
橋外花開日分明雪作圖不將他樹雜未有一家無多
處半青嶂香時過太湖濁醪元易得市遠亦須沽

送孫明府之崇明

昔年芸閣侶鳬舫向南征官俸魚租入衙齋蜃氣成問
程看日出到海聽雞鳴地僻無官長何須束帶迎

迎春日集華光祿齋中

椒盤出五辛下馬拂黃塵千里周南客明朝漢苑春草
生將去路花待欲歸人君有陶潛樂猶勝季子貧

元日都門看早朝二首

春日滿皇都春雲乍有無五更齊玉佩萬戶共桃符天
出臨軒語山當遼殿呼欲知王會禮先問漢鴻臚
萬國盡朝宗天門發鼓鐘樓成五鳩鵲闕是兩芙蓉賦
待凌雲薦書堪計日傭不知隨仗馬猶得近飛龍

王女潭

丹嶂金吾鑿寒潭玉女名面嵐成畫閣架霧起雕楹開
牖通花影疏泉納澗聲此中堪避世何用冒朝纓

送錢象先游楚

七夕仍佳節三湘乍遠遊猿啼巫峽夜人到渚宮秋作
客隨鷗鷺離家望女牛所嗟王粲老不得共依劉

重陽前一日泊新安

亂帆天外落野泊數家村螢火依叢薄蟲聲出草根雨
收山漸碧雲翳月微昏客裏重陽近何人送一樽

送吳郎遊金陵

兩地三春別孤帆千里愁君今遊帝里誰與共仙舟夜
雨連瓜步春潮滿石頭長干管絃地走馬莫淹留

送慧師還五井兼懷其故師楊伯翼

持鉢南歸去長天接遠汀未霜吳樹赤過雨越山青帆
外桃花渡函中貝葉經還將二泉水一酌子雲亭

梁辰魚

夏日泛舟荆溪暮宿湖口

五月荆溪上驚湍走白沙風檣歌聽燕浪楫遠衝花山
勢通吳直溪流向月斜維舟見漁火深樹有人家

秦嘉禾

小孤山

砥柱從開闢中流自古今神龍常在窟怪木不成林絕
頂雲流影懸崖鳥過音吾題百丈壁仙跡倘相尋

董宜陽

初發谷陽夜泊追懷舊遊寄袁魯望

不寐嫌宵永殘星帶月明城烏喧夜柝岸葉亂秋聲世
路悲今昔存亡念友生淒涼感舊賦轉見古人情

沈倬

題張帥清望樓

曉色臨平野高樓屬斷雲連峯當戶入一水傍堦分樹
影參差動禽聲下上聞主人方擁傳草草北山文

卓明卿

江上別黎惟敬

執手河橋上，遙天起片雲。
仙帆千里發，客路一江分。
桂嶺先秋色，樟亭半夕曛。
家山到何日，兩地惜離羣。

陳九州

夜泊荆溪

細柳湖邊岸，青蒲水上舟。
星隨孤月動，山入暝煙收。
鼓柁聞漁浦，懸燈見佛樓。
客途春欲盡，歸思滿滄洲。

盧雲

新秋漫興二首

短髮經秋下裒顏藉酒紅小窗新得月落葉靜鳴風多
病惟高枕無營任屢空自憐吟獨苦仍值寂寥中

地僻秋先到門幽客不經蛩聲共吟韻宵色入丹青古
樹斜留月遙空靜落星坐驚衣袂濕湛露滿中庭

夏日即事次豐吏部

晝寂雙扉掩無人共酒杯睡嫌雛燕語吟惜藕花開郊
雨不能作池風時復來還期問字去載月夜遲回

陳公綸

曉發剡山

曉發剡山路東方白尚微張燈沽酒店帶月旅人衣水
遠孤舟渡煙空一雁飛及秋歸未得徒自憶山扉

山寺作

近郭叢林邃山環逕轉微溪光分石髮厓色亂苔衣樹
密雲能度風閒鳥便飛短藜看未足時傍夕陽歸

秋日

落日驚衰柳西風倒病花物華推小院歲序轉枯槎野

徑隨流曲山籬帶雨斜幾回同逸侶乞酒到鄰家

周東田

客夜

棄置仍為客言歸久未能素枝霜樹月獨夜草蟲燈河
漢秋來圻關山夢到曾明朝對青鏡應見鬢絲增

王濟

游碧巖和石川韻碧巖碧弁之中峯也

歷覽碧巖勝只疑塵境無煙巒淨流翠晴瀑白跳珠隱

約瞻天姥冥濛見太湖丹青誰把筆相對寫新圖

陸倕

早春園居

魏關天今遠陶園歲復新杖藜吾獨往芳草正懷人雪
意頻催酒鶯啼漸入春聖朝多雨露江畔老微臣

顧元慶

山齋誦見寄之作有懷漳河

忽憶漳河子居然有道風一尊黃葉下數口綠雲中鴻

鵲心同遠巖丘興不窮
新詩開大雅莫惜寄郵筒

王延陵

王太史張比部同登翠微閣

石磴千盤轉山樓百尺餘
窗虛雲自入春暖柳將舒
玉笋浮金液瑤闌俯碧虛
叨陪太史宴辭賦媿璫璵

陸承憲

約王子看梅

梅花動山意野客不勝情
長夜思瓊樹青春懷友生
雨

中開欲盡風處落能輕即遣山陰權還同雪裏行

湖上梅花

不獨山中有還從湖上偏全將雪嶂影倒盡玉湖天花
落鷗羣亂香浮雨氣鮮山僧開閣坐相對一蕭然

李維禎

月夜北固山亭得平字

極浦漁燈細幽崖鬼火明春陰團樹色夜半報鐘聲雲
淨千峯出江空一鏡平石闌聊假寐鶴夢與同清

江藤館

捫蘿深入徑倚樹巧安窗
野色憑疎雨潮聲枕大江
雲帆飛片片沙鳥浴雙雙
況有歌金縷能無倒玉缸

真州夜泊

遠樹千帆出孤城一水分
江波翻射日山氣鬱成雲
斷雁寒相叫盟鷗晚自羣
愁心將落葉良夜共紛紛

黃鳳翔

山村晚望

寂歷孤村暮柴門半落暉雲邊飛鳥下牛背牧童歸遠
寺鐘初度遊人跡已稀誰賡叢桂詠待月露沾衣

曉渡金谿

雨外堤痕合溪頭曙色分斷橋餘古木雜樹起朝雲水
急人爭渡風微鷺逐羣武陵應不遠花徑已紛紛

暮泊劔浦

綵鷁方維纜歸鳥正滿林巔雲親舍遠劔水客愁深風
急灘聲亂江空野色沉蕭條閒隱几夢到北山岑

趙志臯

早發錢塘

曉霧兼天白，秋風一葦輕。
湖吞漁浦闊，沙湧固陵平。
隔座吳山送，揚帆越嶠迎。
蒼茫思無限，天外忽鐘聲。

王家屏

玉河新柳

水繞沙堤曲，春看御柳眠。
柔條輕著雨，嫩葉暗抽煙。
影落波間細，陰垂檻外偏。
亭亭依漢苑，遲日待鶯遷。

沈一貫

送人之雷州

庾嶺去猶賒居黎半離華山藏椰子樹溪落蒟蒻花望
月應千嶂窺天自一涯微官是何物秋雨送征車

雨中舟行

天闊雨冥冥孤帆過驛亭雲吞江樹白霧失曉峯青岸
鳥迎船濕河魚出網腥生涯多少恨無處異飄萍

題畫

黯淡秋湖色涵虛望渺然斷橋橫落日遠水出寒煙雁
向平沙落鷗依折葦眠吾家住湖上閒殺采菱船

應制題畫四首

有引

萬厯戊寅正月上出內府畫冊二十六幅命日講
六臣分題奏上各賜銀豆一包時同事者宮詹吳
門申公宮諭信陽何公宮洗新都許公宮贊武陵
陳公翰撰南充陳公也予分得四題如左

雪景

輕綃寒色動不是月華開鳥道千巖迴江光一徑迴虛
無分玉樹彷彿想瑤臺未擬歌黃竹陽春徧九垓

煙雨

瀟瀟一幅上秋氣滿楓林半似隨風引全疑夾霧陰遠
峯看處暝疎樹望來深筆底煙雲色爭知用作霖

宣廟御筆汀鷺

筆端成大造海鳥若相忘暮雨汀沙濕春風岸芷香柳
邊迷落絮雲裏帶飛霜總為經天藻長留羽翰光

鵲鵲

渺彼榆枋翼丹青畫作真靜思宮草日閒傍苑花春顧
影驕金距逢場上錦茵非同珠樹鳥獨用羽毛珍

邵伯湖夕泊

日暮倚蘭橈秋江正寂寥驛門斜對雨郡郭遠通潮急
櫓看商舶寒燈見市橋隋隄前路近欲聽月中簫

長干

白門通市里傳是古長干陌柳藏鴉曙秋潮帶雨寒橫

塘歸客斷子夜舊歌闌別是繁華地休將六代看

秦淮

秋月秦淮岸江聲轉畫橋市樓臨綺陌商女駐蘭橈雲裏青絲騎花間碧玉簫不知桃葉水流恨幾時消

贈人為金吾郎

陌上錦雲連期門校獵旋射聲銀作鎬躡影王為鞭撒草連雙兔凌空接兩鳶應憐漢飛將白首滯窮邊

秋日南溪間眺得李宗伯文書

溪閣非無事秋清日轉長
掃花安鹿柴帖石補魚梁
高樹留新雨平波澹夕陽
遠書何意至三讀素心傷

過雨

五月不知暑虛空颯似秋
殘虹挂溪水片雨過城樓
遠樹斜陽駐深山夕翠流
晚涼思枕簟絕愛北窗幽

陳于陞

宣廟御筆馬

寶繪傳神駿權奇尺素收
蹄攢雙碧玉文散五花虬
赤

汗當沾臆黃金為絡頭天閉今萬匹何必按圖求

林景暘

夜宿山樓

小樓修竹裏下榻白雲深巉石含星動寒蛩抱露吟有
懷遲素月不寐擁孤衾可是煙霞骨彌清松桂心

晚宿長巷

煙景通牛首風塵任馬蹄石田山上下礮水岸東西波
沸魚難穩林深麈不迷晚來投宿處明月下前溪

夜行湘湖道中

買得西陵棹還同暮色浮烏棲江樹令人靜海風秋歎
枕聽湍瀨推篷見驛樓山城臨水閉隱隱送更籌

張位

夜聞鴈聲有感

嘹唳關河遠徘徊旅思長一天秋似水滿地月如霜念
爾心千折憑傳札十行不堪遊子淚人北鴈南翔

山中雜吟

好景春三月名山碧四圍穿林行信步臨水坐忘機樹
密多幽鳥窗虛總翠微任真閒笑語終日不知歸

七夕

塞月催砧急天風襲袂深星河良夜色牛女隔年心莎
徑流螢度花陰促織吟平生江海意在苒二毛侵

裴應章

豐嶺卽事

倚杖危峯上煙霞嶂幾重逶迤盤古道絕勝引仙蹤露

滴晴天雨雲低半嶺松蓬壺何處是天際一聲鐘

范謙

登釣臺謁子陵祠

桐江千疊下砥柱著高臺夾岸羣山合中流匹練回披
裘人獨往艤棹客重來矯矯冥鴻遠停斟濁酒杯

沈思孝

喻邦相同俞羨長至集恕醉軒

白雲邀上客黃葉繞貧居缸面沽來酒槎頭釣得魚山

川連越絕雞犬數秦餘一日千秋意相看老不疎

思家

長卧鳳城隈鄉心日夜催小人猶有母明主漫憐才木
葉千山雨江湖八月雷倚閭秋欲盡底事不歸來

出都門

天高落葉繁匹馬上東門固寵寧臣節完名是主恩青
雲雙關迴綠野幾家存滿筐匡時草攜歸覆酒尊

賈三近

冬日登嶽

游目高寒處羣山擁岱宗登封迷漢草徙倚有秦松萬
壑煙嵐合諸天紫翠重肩輿明月下上界已聞鐘

朱孟震

和荅正甫

幽意苦不愜清歡良未期如何汾水上忽枉故人詩芳
草王孫路朱華帝子池相思隔年歲河漢正高垂

張一桂

送邵梅墩年兄請告還越

去去若為別秋聲滿灞橋漫辭燕市酒獨聽浙江潮八
月楓林冷千山雁影遙相期各努力且莫混漁樵

蔡文範

晚霽

沙路晴猶濕山雲暗忽開短帆投暮去高鳥拂屏回虹
斷疑窺井江清似潑醅不知南浦外何事復輕雷

自瀛德趨東昌道中雜言

甸服仍周典溝渠自禹功幽并千磧合江漢萬方同翠
柳沿堤暗雕楓積塢紅誰家調錦瑟清宴小樓中

初夏

春去歸何處端居感歲華夏雲生伏枕江鳥下平沙綠
水當門住青山遶郭斜東鄰前日過已見石榴花

顧大典

郡齋即事

空齋無一事散帙有餘閒古蔓垂衣桁疎花照客顏雲

陰方抱日雨氣忽沉山徙倚當高處紛紛暮鳥還

南還入吳門道中

一入吳門道依然故國情過關逢雨雪歸棹及春耕野
市山櫻熟江村布穀鳴閒雲如有意出岫故相迎

春日木末亭延眺

帝里春偏麗招尋興未闌一尊攜木末雙吹出雲端谷
靜禽言細林深花影寒歸途有明月醉向馬頭看

為園

一從牽世網已自十年餘却憶灌園子因看種樹書雲霞疑作陣花竹自成居擾擾車塵裏清幽想未如

送秦郡倅還楚中

一朝辭簿領千里返江湘棄置君何罪離羣我自傷春風過夏口秋草卧衡陽為報南來雁音書好寄將

陳允升

舟中還自長安憶玉峯諸友

悵望無多日迴橈已九秋遙天喧野鶴急水泛閑鷗朗

月思玄度清狂憶子猷客情無可道愁對荻花洲

喻均

請告書懷

夙昔浮雲意微官久欲休蹉跎身漸老丘壑願方酬
海日猶殘暑山風欲度秋盈盈河水上萬里送歸舟

鄧以讚

思歸

星河雲氣淡萼菊露華清宦況慵兼病鄉愁斷又生入

秋偏遠夢逐日計歸程南雁空中唳能禁此夜情

郭子章

舟中

三春滯水漬魚鳥狎成羣江濁流新雨山晴斂薄雲村
舂幽澗急岸草夕陽薰何處城頭角偏令倦客聞

周光鎬

大梁道上

眺望中原路逶迤入大梁風塵馳朔騎節序改青陽衛

水浮煙黑沙河落日黃愁來看短缺猶帶薊門霜

吳中行

賦得露凝仙掌

絳關秋容靜金莖露氣長夜深方湛湛日出轉灩灩共
喜仙人掌能渟玉女漿願持方聖澤沾灑徧遐荒

丁元復

贈錢少室

長憶問奇年于今各一天雲深花是宅溪隱筆為田寄

興煙霞外忘機鷗鳥邊蕭蕭廣成子吾道足真詮

早春過趙凡夫池館

幽棲何所定選勝得支硎檻底泉鳴玉天邊石作屏江
梅依磴戶谷鳥浴清泠千丈源頭瀑宜添一草亭

吳中立

舟行白下

江天澹秋色斜日照孤篷漁艇沿門繫蒹葭到處通鳥
飛帆影外人在鏡湖中始覺煙波叟浮家趣不窮

熊敦朴

得趙汝師太史書

章臺猶旅食珍重故人書自是飄零久非關記憶疎
野花紅更發官柳綠仍舒浩蕩乾坤意吾生總不如

馮時可

襄陽送蔣生

乾坤俱逆旅江漢又離羣暮雨驅飛葉寒濤捲白雲
聽猿人下淚立馬雁行分三疊陽關曲淒清不可聞

金史曰
卷六十
憩大荆館

野色綠堪把山容翠可憐
臨湖開石室隔岸見原田
雲護參天樹風驅度嶺煙
桃花處處發疑是武陵川

錢比部攜酒園閣得何字

晚年偏好靜結構近山阿
僮僕親花藥衣裳製芟荷
林深浮翠暗閣迴染霞多
不醉郎中酒其如佳興何

燕山雪

十月幽州道風嚴盛雪花
飛灘銀浪細點樹玉條斜
海

暗迷寒雁山空噪餓鴉關河冰正鎖何處覓歸槎

寄朱兵使

西風吹一雁寒色滿蕭關偃蹇三河客飄零幾日還塵
途雙白鬚旅夢半青山麟閣無消息空摧游子顏

早秋舟中

吳門風物好泛艇漫迴沿山色元非雨秋光別有天片
雲潛度暑一葉暗催年大塊何舒慘誰令宋玉憐

劉連

首夏東莊

隍水城根閣樓陰鏡上浮鳥窺楊柳下魚撥芰荷遊濯
足涼雲落垂綸曉月留何須山簡藥日醉習池頭

夏日東莊雜詩

避河巢北地形勝俯煙霞常坐垂門柳遙看近水家馬
牛連曉徑雞鶩散晴沙岡上猶言熱城陰看藕花

許昌客舍雨


西風吹暮雨客舍淨埃氛捎戶斜斜急滴堦細細分山

迷浮野霧城入度溪雲已近重陽日黃花隔院聞

高村曉發呈同旅

危橋徐度馬村口曙光分石勢迎河立灘聲隔路聞鶯
遷明曉月山小失春雲談讌長亭外途窮賴有君

御選明詩卷六十



總校官庶吉士臣侍朝

校對官檢討臣蕭九成

謄錄舉人臣傅瓌芳